

無上祕要卷之十七附八

八

眾聖冠服品上

道君冠服

元始天王建无極洞天之冠披九色雜羅之帔飛森霜珠之袍帶晨光日鈴育延之劍左

佩豁落右佩金真

右出洞真太極金書上經

元始天王頭建九氣流精紫曜之冠衣九色

无縫赤斑自然虎帽腰帶太山火玉

高上玉皇頭建无上七曜寶冠衣王文明光

飛雲之裙佩丹皇玉章帶治金飛精招山之

劍

右出洞真變化七十四方經

九天丈人著九色斑文之裘頭戴紫晨之冠

坐紫虛之上空玄之中

右出洞真紫書金振上經

中央黃老君佩龍玄之文神虎之符帶流金

之鈴執紫毛之節中金精中或扶華晨冠

右出洞真九真中經

大帝君建七寶朱冠披九色自然雲文之帔

飛羅耀光羽袍腰帶鳳章流金火鈴手執命  
魔九色之節九老仙都擎金精立空之案

右出洞真太極金書上經

玉珮魂精帝君披珠繡華帔飛錦青裙帶月

銜日首建紫冠執玉珮立左

金瑤魄靈帝君披紫繡珠帔飛羅丹裙帶日

銜月首建華冠執金瑤立右

右出上清寶文

高聖太上大道君佩九色雜羅之帔飛霜珠

錦之裙中須臾百變之冠帶晨光日鈴育延

之劍豁落交帶玉璽鳳章流金耀虛七精激

无上詣九層七映朱宮

右出洞真七聖元紀經

元君冠服

白素右元君上著龍文白錦帔下著白錦華

裙頭建紫華芙蓉冠腰佩神金二虎符左手

執流金火鈴右手執太上智慧經

黃素中央元君上著黃錦雲帔下著黃羅飛

華裙頭建紫華芙蓉冠腰帶神金二虎符左

手執火鈴右手執大洞真經

紫素左元君上著虎錦紫帔下著紫華龍文  
裙頭建紫晨扶華冠御紫晨雙珠蓋腰帶流  
金火鈴又佩神金明月二虎符左手執太上  
消魔經右手執金真玉光章

右出洞真玉晨明鏡雌一寶經

太素三元君乃一真之女子則三素元君之

母頭建寶琅扶辰羽冠服紫氣浮雲錦帔九

色龍錦羽裙腰帶流金火鈴虎符龍書

太素元君長女曰紫素元君即无英君之母

頭建太真晨嬰之冠三角結餘髮散之垂腰

上著紫錦袷下著飛霜羅裙交帶靈飛大

綬

黃素元君即太素之中女中央黃老君之母

頭建太真晨嬰之冠三角結餘髮散之垂腰

上著黃錦袷下著五色飛青錦裙佩鳳文

琳華之綬腰帶流黃揮精之劍

白素元君即太素元君之少女白元君之母

頭建太真晨嬰之冠三角結餘髮散之垂腰

上著白錦光明袷下著飛霜綠錦飛裙佩

六山火玉之珮鳳文之綬腰帶日廷耀暉之

劍

右出洞真三元玉檢布經

五極帝君冠服

上清瓊宮東極玉真青帝君頭建九氣通精之冠衣青錦帔碧羅飛裙腰帶流金鳳章手

執甲乙通靈青精玉符

上清瓊宮南極玉真赤帝君頭建三氣進賢之冠衣丹錦帔緋羅飛裙腰帶火精鍊身之

劍手執丙丁通靈赤精玉符

上清瓊宮西極玉真白帝君頭建七氣通天寶冠衣白錦帔素羅飛裙腰帶金光日廷之

劍手執庚辛通靈白精玉符

上清瓊宮北極玉真玄帝君頭建五氣玄寶之冠衣玄錦帔玄羅飛裙腰帶七元丹章手

執壬癸通靈玄精玉符

上清瓊宮中極玉真黃帝君頭建通元五炁之冠衣黃錦帔黃羅飛裙腰帶中元命神之

章手執戊己通靈黃精玉符

右出洞真瓊宮靈飛六甲經

五帝玉司君冠服

青帝玉司君衣飛青羽衣九色鳳章頭戴九元寶冠手執九色之節治東大明陽臺洞天赤帝玉司君衣絳章丹衣九色鳳章頭戴平天飛神玉冠手執九色之節治南朱陽之臺洞天

白帝玉司君衣素華明光白錦之衣七色鳳章頭戴飛精曜大寶冠手執七色之節治西羽之野洞天

黑帝玉司君衣阜文衣五色鳳章頭戴玉精通天寶冠手執五色羽節治玄陰大冥洞天

中央黃帝玉司君衣黃衣之裝備九色之章頭戴通天玉寶宸冠治太玄中宮主統无上无下无内无外无表无裏无執數劫无崖之天

右出洞真四極明科

五方帝冠服

東方安寶華林青靈始老號曰蒼帝頭戴青精玉冠衣九炁青羽飛衣

南方梵寶昌陽丹靈真老號曰赤帝頭戴赤精玉冠衣三氣丹羽飛衣

中央玉寶元靈元老號曰黃帝頭戴黃精玉冠衣五色飛衣

西方七寶金門皓靈皇老號曰白帝頭戴白精玉冠衣白羽飛衣

北方洞陰朔單鬱絕五靈玄老號曰玄帝頭戴玄精玉冠衣玄羽飛衣

右出洞玄赤書玉篇真文經  
靈童衣服  
九氣青天中有元始青靈童衣青羽衣手執青麾侍文

三氣丹天中有元始赤靈童衣赤羽衣手執赤節侍文

中央黃天中有元始黃靈童衣黃羽衣手執黃鏡侍文

七氣素天中有元始素靈童衣白羽衣手執白旗侍文  
五氣玄天中有元始玄靈童衣玄羽衣手執烏幢侍文  
右出洞玄赤書玉訣經  
三天玉童頭建三華寶曜洞天冠衣青黃七

變錦袍帶朱精禁天之章佩七曜流金之鈴

右出洞真變化七十四方經

洞天混化君冠服

太上神仙洞天元洞元明元曜延靈元君頭

冠飛晨寶冠衣青錦單裙

太上神仙洞天元洞青耀少陽啓明天君頭

冠青建晨玉冠衣青綾之裙

太上神仙洞天元洞黃靈太丹炎薰光大赫

太陽君頭冠三玄寶冠衣黃靈錦裙

太上神仙洞天元洞東陽太歲重華耀靈天

仙元命君建飛晨玉冠衣單青飛裙

太上神仙洞天元洞東極太元皇靈寶魂耀

魄君建青精玉冠衣飛青羽裙

太上神仙洞天元洞歲星延崖青靈常陽玉

女作飛雲髻衣青羅飛裙

太上神仙洞天元洞太陽耀靈南極丈人絳

宮玉臺頭作三角雲髻衣青飛裙

太上神仙洞天元洞景陽東皇青陽翠靈山

童頭作三建雲髻衣青文裙

太上神仙洞天元洞赤皇廷齡娥容太丹赤

圭玉女頭作頽雲髻衣朱文飛裙

洞地混化君冠服

太上神仙洞地洞真大熒惑大洞元生大靈

機皇君頭冠朱寶三梁之冠絳章單衣

太上神仙洞地洞真南陽炎域元執法延壽

司錄君頭冠玄雲寶冠衣丹紋裙

太上神仙洞地洞真中耀五陽五陰中皇洞

極玄天太虛君頭冠遠遊冠衣丹錦裙

太上神仙洞地洞真三天都錄司命司錄司

危司度洞生君冠玄晨玉冠衣朱文飛裙

太上神仙洞地洞真南極大赤星靈寶魂耀

魄君冠玉精寶冠衣絳章單裙

太上神仙洞地洞真皇衛赤陽絳璋通靈仙

童冠通天玉寶之冠衣絳紋飛裙

太上神仙洞地洞真大鎮元黃太素皇機執

忠五靈玉童頭作飛角髻衣黃羅裙

洞淵混化君冠服

太上神仙洞淵洞玄太白子留金城耀耀元

精元導大仙君冠玄晨玉寶冠衣素錦飛裳

太上神仙洞淵洞玄太白皓素天機大星光

君冠遊雲寶冠衣素文飛裙

太上神仙洞淵洞玄太白耀金光少陰吳元

素上皇白人君冠玄晨冠衣白錦飛裙

太上神仙洞淵洞玄大辰玄洞元陰五耀延

靈元華鬱單君冠通天之冠衣玄雲錦裙

太上神仙洞淵洞玄耀烏洞玄門太極五仙

君冠玄晨冠衣玄文單裙

太上神仙洞淵洞玄北極大仙元皇寶魄耀

魂君冠通天冠衣玄衣

太上神仙洞淵洞玄玄耀陰輝元神太極元

皇耀靈元化玉童作飛雲三建髻衣素文裙

太上神仙洞淵洞玄陰景西皇素陰靈玉童

作三建頽雲髻衣玄錦飛裙

太上神仙洞淵洞玄大白廷影九導大洞承

翼玉門金樓玉女作頽雲髻衣白羅之桂

右出洞真素靈大有妙經

無上祕要卷之十七